

CONSULTATIO

PARISII CVIVSDAM
DE CONTROVERSIA
INTER SANCTITA-

tem Pauli quinti & se-
renissimam Rem-
publicã Ve-
netam.



*AD VIRVM CLARISSI-
mum Venetum.*



Anno M. DC. VII.



CITIZENSHIP

MASSACHUSETTS

AND

THE

STATE OF NEW YORK

IN SENATE

January 1, 1900

REPORT

OF THE

COMMISSIONER OF THE LAND OFFICE

IN RESPONSE TO A RESOLUTION

PASSED BY THE SENATE

APRIL 1, 1899

ALBANY:

JOHN B. LANE, PRINTER

1900

100

100

100





CONSULTATIO



CEPI tuas literas, vir
clarissime, quibus me ro-
gas, ut de controuersia quæ
est inter Sanctitatem Pau-
li quinti, & Serenissimam Rempu-
blicam vestram tibi respondeam, cu-
ius controuersia tria narras esse præ-
cipua capita. Primum de coercitio-
ne criminum quæ à clericis admit-
tuntur. Secundum de decreto Se-
natus, quo prohibuit ne loca vene-
rabilia deinceps sine eius voluntate
extruerentur. Tertium de prohibi-
tione laicis facta ne res soli in eccle-
sias sine eiusdem Senatus assensu trās-
ferrent. Cum autem ut tibi obseque-

rer, me paro, allatus est ad nos liber
 patris Pauli theologi & religiosi viri
 ordinis Seruorum de ea re doctissime
 scriptus, quem ab omnibus populis
 & principibus viris legi, reipublicæ
 Christianæ maximè interesse puto.
 Quare opera illius elegantissima præ-
 uentus ad te tantum ea scribam quæ
 ex authorum nostrorum libris de-
 prompta, eius scriptioni addi posse
 sensero, sequutus ordinis nostri ho-
 minum libertatem hætenus non ab-
 rogatam & utilissimum publice mo-
 rem, quo rogatis illis licet licuitque
 semper de controuersijs quæ inter
 principes de summis etiam rebus o-
 riuntur, ex boni & æqui scientia re-
 spondere. Sed antequam dicere inci-
 pio de tribus capitibus controuersia,
 videndum est quo iure Italia regatur,
 quæ res communi bono cùm ponti-

ficis tum Principum Italiae cessura est; & illius legitimam & canonicam auctoritatem, horum vero libertatem confirmatura. In primis Italiae cum omnibus christianis gentibus hoc commune est, ut in rebus ecclesiae regatur iure diuino quod sacris scripturis continetur, cui iuri neque reges, neque pontifices, neque tota hierarchia ecclesiae derogare possunt. Quod ad reges attinet, sic est sancitum can. non licet. distinct. 10. *Non licet Imperatori neque cuiquam pietatem custodienti aliquid contra diuina mandata praesumere, nec quidquam quod euangelicis prophetis aut apostolicis regulis obuiet, agere* Pontificum vero nomine par est non alium respondere quam Papam. Is erit urbanus can. sunt quidam 25. q. 1. *Sciendum est, inquit, summo opere, quia inde nouas leges condere potest, (Ro*

manus Pontifex) unde Evangelistæ aliquid aut Prophetæ nequaquā dixerunt. Vbi verò aperte dominus, & eleius Apostoli et eos sequētes sancti patres sentētialiter aliquid definierunt, ibi non nouā legē Romanus Pōtifex dare, sed potius quod predicatum est vsque ad animam & sanguinem confirmare debet. Si enim quod docuerunt apostoli destruere (quod absit) niteretur, non sententiam dare, sed magis errare conuinceretur. Hierarchiæ vero ecclesiasticæ nomine respōdebit Cōcilium vniuersale Nicenum secundū can. 2. Substantia nostræ hierarchiæ, inquit, sunt sermones à Deo traditi, diuinarum scilicet scripturarum sciētia vera. Hanc regulam Concilium Nicenum secundū sumpsit ab Ephesino, quod epistola ad Pamphilię synodum scripta, his verbis illi præcipit. Omnia facias cum consilio sacræ scripturæ quæ di-

uinitus est inspirata. Dein Italia regitur iure Romano Iustiniano cuius pars est codex canonum ecclesiæ veteris catholicæ ab ipso iure imperatorio confirmatus. Quam libertatē Italia summa cura & vigilātia sibi defendit, non tantum Pontificibus Romanis testibus, sed & propugnatoribus acerrimis cū in rebus tēporalibus tum in ecclesiasticis: quod per seriem temporum mihi demonstrandum est. Ante tempora Iustiniani Imperatoris ad Theodoricum Gothum regē Italiæ Papa Gelasius scribit can. certum. distin. 10. in hæc verba, *Certum est magnificentiam vestram leges Romanorum Principum quas in negotijs hominum custodiendas esse præcepit, multo magis circa reuerentiam beati Petri Apostoli pro suæ fælicitatis augmento velle seruari.* Gothi verò Italia pulsas à Iustiniano,

impetrauit ab eo Papa Vigilius pragmaticam sanctionem, qua forma Italiae receptae data est. Eius pragmaticae initium sic est, *Pro petitione Vigilij venerabilis antiquioris Romae Episcopi quaedam disponenda esse censuimus ad utilitatem omnium pertinentia, qui per occidentales partes habitare noscuntur.* Deinceps articulo decimo sic ait, *Iura insuper vel leges codicibus nostris insertas quas iam sub edictali programma in Italiam dudum misimus, obtinere sancimus, sed & eas quas postea promulgauimus constitutiones iubemus sub edictali programma vulgari, & ex eo tempore quo sub edictali programma vulgatae fuerint, etiam per partes Italiae obtinere, ut una volente Deo facta republica, legum etiamstrarum vbique prolatetur authoritas.* Postquam verò Imperatores occidentis Italiam in potestate & ditione habuerunt,

buerunt, Papa Leo 4. eandem rem
postulauit à Lothario augusto, quæ pe-
titio illius habetur in can. vestram,
distinſt. 10. *vestram* inquit, *flagitamus*
clementiam, *vt sicut hætenus romana lex*
viguit absque vniuersis procellis & pro
nullius hominis persona reminiscitur esse
corrupta: ita nunc suum robur proprium-
que vigorem obtineat. Quod quidem
ius Iustineaneum publicè prælectum
est Romæ imperatorum autoritate
qui post Iustinianum regnarunt, vt
& Beryto & Constantinopoli quibus
tantum in locis ab ipso iure permis-
sum vt publicè doceretur. Authori-
tate imperatorum in Italia inminu-
ta, & repertis in Amalphitana vrbe
Digestis, quæ diu latuerant, Irnerius
iussu comitissæ Mathildis Iustinaneū
ius publicè docuit Bononiæ, quo
munere successores eius in eadem vr-

be Pontificum Romanorum ornatu
 stipendijs & priuilegijs functi sunt.
 Pontificum exemplum totius Italiæ
 principes maximèq; serenissima res-
 publica summo ardore sequuta est.
 Hinc factum est vt Honorius secun-
 dus Papa de iure respondens cap. 1.
 ex. de Iuram. calum. his verbis vtatur,
Decernimus, inquit, & auctoritate im-
periali irretractabiliter definimus. Defi-
 niebat autem & respondebat de iu-
 re-iurando clericorum ex codice ca-
 nonum primitiuæ ecclesiæ ab impe-
 ratorio iure confirmato. Quod eo
 magis ab hominibus harum rerum
 peritis est obseruandum, quia inter
 pontifices Gregorij septimi succes-
 sores sedit Honorius secundus, qui
 omnes hæreditatem odij creuerunt,
 quo Gregorius septimus imperato-
 res & eorum iura regia, dignitatem-

que omnium regum sunt prosequuti. Quare tota Italia in hoc iure quod coluit libertatem suam esse positam semper existimauit. Nec verò solum secularium rerum causa tanto studio laborarunt pontifices romani in hoc iure retinendo, sed etiam ut ecclesiasticæ controuersię secundum illud dirimeretur, supra quas ecclesię causas eminet reuerentia beati Petri apostoli quam ex hoc iure seruari postulabāt à Theodorico rege Gothorum. Nec enim definitiones factæ ab hoc iure de rebus ecclesiasticis in Italia sola religioſe obseruabantur, verū etiam in toto orbe christiano: Cuius rei testis est locupletissimus, can. de illicita 24. q. 1. synodus parisiensis sub Ludouico Pio habita, quæ ait ab vniuersa ecclesia seruari constitutionem à Iustiniano factam de excommunica

tionibus quæ ab episcopis præter causas canonicas fiunt. Quæ constitutio à Iuliano antecessore latinè literis madata est cum cæteris Nouellis Iustiniani, quarum ex eius interpretatione cognitionem iam pridem habuit Italia, Iuliani hæc sunt verba, *Nemo episcopus, nemo presbiter excommunicet aliquem antequam causa probetur, propter quam ecclesiastici canones hoc fieri iubent. Si quis autem aduersus ea excommunicauerit aliquem, ille qui excommunicatus est maioris sacerdotis auctoritate ad gratiam sanctæ communionis redeat: is autem qui non legitimè excommunicauit, in tantum tēpus abstineat sancta communione, quantum maiori sacerdoti visum fuerit, ut quod iniuste fecit, ipse iuste patiatur.* A Iustiniano autem, post omnes, qui cum antecesserunt christiani imperatores, probatus est & confirmatus codex cano-

num ecclesiæ catholicæ qui omnium
manibus terebatur, & secundum quæ
synodi vniuersales ipsæ de controuer-
siis ecclesiasticis sententias ferebant.
Sub hoc iure nata est serenissima res-
publica vestra christiana catholica,
sui iuris, libera: ab hoc alita, instituta,
aucta, & summam dignitatem merito
consequuta: ad eius prescriptum vixit
& Italiæ maximam partem viuente
vidit. Cum hæc ita sint, innouāda mi-
hi est & instaurāda codicis canonum
ecclesiæ primitiue memoria, & è te-
nebris obliuionis quibus iam diu se-
pulta fuit, excitāda. Quod necesse est
disceptanti mihi controuerſiæ capita
quæ proposuisti: simul etiā vt ex hac
restitutione fiant manifesta tam quæ
erant in eo codice quam quæ non e-
rant, quæque tamen vulgo solent illi
falso tribui confirmandæ & tuendæ

cupiditati & ambitioni quorundam ,
quasi ex autoritate sanctorum cano-
num veteris ecclesiæ . Neque enim e-
xistimare debemus sanctissimos & sa-
pientissimos patres illos veteres ec-
clesiam iure incerto, sine regularum
& definitionum collectione certa re-
xisse, vel canones quibus illa regere-
tur habuisse sparsos, vagantes, nullius
collectionis corpore cōclusos, vt pro
libidine cuiuscūque licuisset per falsi
crimē supposititios canones ecclesiæ
obtrudere, qui mos semper fuit ambi-
tionis & cupiditatis humanæ, quod
libuisset authoritati ecclesiæ vniuer-
sæ tribuere . Postulant à nobis patres
illi, vt de sua pietate & prudentia po-
tius ita sentiamus, voluisse illos ec-
clesiam habere corpus certum regu-
larum sui iuris, quas ex certis conci-
liis collegerint, & concilia certo ordi

ne disposuerint, certoque & immutabili numero canones illorum complexi sint, cui neque addi neq. detrahi à quoquam posset, vt hoc quasi vallo & muro septum iuris corpus aduersus falsi crimen vndique tutum esset. Neque tantum vt falsum præuenirent solebant veteres iura sua in certa corpora colligere, sed etiam vt vim omnem iuribus extra collectiones publica auctoritate factas vagantibus & dispersis adimerent. Ob easdem causas Theodosius imperator Nouella de confirmatione corporis suarum Nouellarum, ait se in corpus vnius codicis constitutiones præcessorum suorum redegisse: ne aliter nisi ex ipso codice in iudicio proferrentur. Eandem rationem & consilium sequutus Iustinianus codicem suum fecit, constitutiones in multa volumi-

na dispersas in vnum corpus colligendo, quod ipse testatur l. vn. C. de emendatione codicis Iustiniani, unde iura extrauagantia posteritas appellauit quæ non in corpore codicis, sed extra corpus diuagarentur, vt Iustiniani verba usurpem, quibus eodẽ loco vsus est. Ea fuit primum, antequam componeretur codex Theodosianus, prouidentia & vigilantia patrum ecclesiæ catholicæ quæ collectionem suam corpus codicis canonum nūcupauit, quemadmodum & imperatores corpus codicis constitutionum suarum dixerūt. Quare etiam in more habebat ecclesia alia iura quæ illi obtrudebantur codice suo non comprehensa, velut notha & adulterina nulliusque authoritatis reijcere, quod Gallicani episcopi fecerunt, teste acerrimo authorita-

tis romanę defensore Nicolao primo papa, qui in epistola quam ad illos scripsit relata in codicem Gratiani can. si romanorum distin. 19. hæc illorum verba recenset, *Quanquam*, inquit, *quidam vestrum scripserint haud illa decretalia priscorum pontificum in toto corpore codicis canonum inueniri descripta*. Sed quis melius nos docuerit hanc mentem & prouidentiam ecclesiæ catholicæ quàm eadem ipsa, quæ cum conuenisset in concilio Calchedonensi, quod quatuor primorum œcumenicorum postremum est, actione octaua cognoscens de controuersia mota de episcopatu, nonagesimum quintum & nonagesimum sextum canones citat corporis sui canonici, & ex eorum iure de controuersia pronuntiat, cuius actionis octauæ verba sunt hæc: Gloriosissimi iu-

dices dixerunt. Legantur hi canones Leontius reuerendus episcopus Magnifiæ ex codice legit regulam nonagesimam quintam. *Si quis episcopus vacans super ecclesiam vacantem semetipsum iniiciens subripuerit sedem præter perfectum concilium, hunc expellendum esse, licet omnis populus quem arripuit, eum elegerit. Perfecta verò synodus illa est, cui interest & metropolitanus episcopus.* Idem reuerendus Leontius ex eodem codice legit regulam nonagesimam sextam. *Si quis episcopus ordinationem acceperit episcopatus & populo præesse decretus non acquieuerit ordinationi, neque ei persuasum fuerit proficisci ad ecclesiam sibi commissam, hunc excommunicatū esse, donec coactus acquiescat aut quicquam de eo episcoporum provincia synodus perfecta definiat.* Hi duo canones reperiuntur hodie in concii-

lio Antiocheno, quod libro continetur, qui vulgariter appellatione canonum apostolorum & conciliorum inscribitur, suntque illi duo canones, alter sextus decimus, alter septimus decimus concilij Antiocheni. Horum numerorum ope adiuti, & eo ordine quo canones illi collocati fuerunt in codice canonum antiquo, & illo quo reperiuntur hodie in concilio Antiocheno, nos viam & rationem, si qua est, reperire debemus, qua codicem antiquum quo ecclesia catholica in Concilio Calchedonensi usa est, restituamus. Ita enim compositum codicem antiquum esse oportuit, ut canones illi duo, nempe sextus decimus, item septimus decimus concilij Antiocheni, reperiantur alter nonagesimus quintus, alter verò nonagesimus sextus in serie canonum

totius illius codicis antiqui. Quod
ut fiat primum obseruandus nobis
est ordo, quo collocata fuerunt con-
cilia in codice antiquo initium à Ni-
ceno facientes. Qui quidem ordo in-
uenitur hodie in locis quinque vete-
ris memoriæ qui ad nostram vsque
ætatem conseruati sunt. Primus lo-
cus reperitur in concilio Constanti-
nopolitano in Trullo can. *ἐπισκοπαι-
ζουμεν*. vbi hoc ordine recensentur. Cō-
cilium Nicenum, Ancyranum, Neo-
cæsariense, Gangrēse, Antiochenum,
Laodicense, Constantinopolitanum,
Ephesinum & Calchedonense, quod
actione octaua citat canones nona-
gesimum quintum & nonagesimum
sextum huius codicis. Eodem ordi-
ne disponuntur in codice canonico
Græco ecclesiæ orientalis Lutetię Pa-
risiorum edito., diligentia Iohannis

Tilij Engolismensis, qui post editionem quam cardinali Turnonio dicauerat, episcopus Meldensis factus est. Codex autem ille græcus per omnia conuenit cum codice Photij latine tātūm apud nos edito, & sola lingua alter ab altero differt. Hac eadem serie collocantur in codice moguntino qui editus est anno 1525. quem moguntinum codicem dicunt esse veterem romanum ij qui recognouerunt codicē Gratiani iussu Gregorij 13. in præfatione recognitioni sue præfixa. Seruauit eum ordinem Pontifex romanus Leo quartus in enumeratione quam facit horum conciliorum scribens ad episcopos Britannię can. De libellis. distin. 10. Horum quinque testimoniorum tria prima feruntur ab ecclesia orientali, duo posteriora Roma nobis conseruauit

locus occidentis omnium celeberrimus. Quare certissima sunt hæc testimonia ab ecclesia vniuersa lata de ordine conciliorum in codice canonico quem in manibus habebat illa in concilio Calchedonenfi. Imo tanta fuit ecclesiæ religio in compage corporis canonum conseruanda, vt cum ordinem temporis non seruasset in collocaione conciliorum Ancyrani & Neocæsariensis quæ Nicenum concilium posterius tempore sequuntur collectionis ordine, lectores monuerit ita factum propter reuerentiam quæ debetur Niceno, quod primum omnium œcumenicum ipsa celebrauit. Quod suum consilium præfixum est initijs conciliorum Ancyrani & Neocæsariensis inscriptione quæ etiamnum in codicibus græcis seruata est, cuius inscriptionis ra-

tio vulgo ignoratur & videtur hodie sine vllō vſu his concilijs præfixa, ſoluto corpore codicis antiqui & vagis & diſperſis ſingulis extra ſuum corpus concilijs per volumina, quæ vbi-que eduntur, conciliorum. Poſt ordinem quem habuerūt in codice antiquo ſingula concilia obſervatum, enumerandi ſunt canones illius codicis initium à primo canone Niceni concilij ſumentes, neque cum ad finem cuiuſque cōcilij peruenerimus, à diſenumeratione tamen ceſſandum eſt, ſed continua nec interrupta numerorum ſerie vtendum, qua numerandi forma vſum eſt concilium Calchedonenſe. Ea cum peruenerimus ad canonem ſextum & decimum cōcilij Antiocheni à concilio Calchedonenſi citatum, qui canon incipit in codice orientali *εἰ τὸς ἐπίσκοπος σχολά-*

ζωv & in codice romano Moguntia^e edito, *si quis episcopus vacans*, reperimus illum canonem esse nonagesimum sextum codicis orientalis quem dedit Tilius, at verò esse nonagesimum quartum codicis romani Moguntia^e editi. Nam in codice orientali viginti canones concilij Niceni, quinque & viginti Ancyrani, quindecim Neocæsariensis, viginti Gangrēsis, sexdecim Antiocheni, hi, inquam, omnes numeri coniuncti sex & nonaginta efficiunt. At in codice romano viginti canones concilij Niceni, quatuor & viginti Ancyrani, quatuordecim Neocæsariensis, viginti Gangrensis & sexdecim Antiocheni, hi, inquam, coniuncti numeri quatuor & nonaginta efficiunt. Rursum ad his duabus rationibus differt ratio cōcilij Calchedonensis.

Nam

Nam ratio codicis romani canonem sextum & decimum concilij Antiocheni efficit quartum & nonagesimum codicis canonici antiqui: ratio concilij Calchedonensis cum facit quintum & nonagesimum: at ratio codicis orientalis sextum & nonagesimum. Quod verò attinet ad contextum & verba codicum orientis & romani, planè consentiunt, neque plus verborum est in hoc quam in illo. In hoc solo differunt quod in concilijs Ancyrano & Neocæsariensi canon quidam in vno ex illis codicibus, in alio diuisus est in duo membra, & ex vno duo facti sunt canones. At componendæ huic parvæ codicum controuersię obseruanda est antiqua ratio quæ proculdubio fuit in vsu concilio Calchedonensi, sicque certissima fides codici canonico antiquo resti-

tuetur. Initium faciam controuer-
siae codicum componendae à concilio
Ancyrano. Hoc quinque & vigin-
ti canonibus constat in codice orien-
tis, at quatuor & viginti tantum in
codice romano: hoc ideo quia quar-
tus & quintus canones huius concilij
in codice orientis, vnicum cano-
nem efficiunt qui quartus est in co-
dice romano. Præstat autem ratio
codicis orientis, eaq; veteres vsi sunt.
Nam Photius patriarcha Constanti-
nopolitanus vbicunque in Nomo-
canone citat concilium Ancyranum,
hanc rationem sequitur. Theodorus
quoque Balsamo libro secundo com-
mentariorum diuidit concilium An-
cyranum in quinque & viginti cano-
nes. Harmenopulus iudex Thessalo-
nicensis eandem sequutus est ratio-
nem in tota epitome sanctorum ca-

nonū, & sectione quinta tituli quarti distinctè & diuifim citat canones quartum & quintum concilij Ancy-rani, qui in codice romano pro vno habentur. Sed & difertè citat canonem quintum & vigefimum huius concilij sectione quinta tituli tertij. Ex latinis Ferrandus diaconus ecclefiæ Carthaginenfis fequitur & hanc rationem in breuiarij capitibus cētefimo quadrefimo octauo, & deinceps vſque ad centenſimum quinquageſimum quintum, & alijs item capitibus. Hæc dicta ſint de rationum differentia canonum concilij Ancy-rani quæ eſt inter codices. Concilium verò Neocæſarienſe tot canones habet in codice orientali quot & in codice Tiliano, nēpe quindecim. At in codice Moguntino, qui vetus romanus eſt, quatuordecim canones

habet. Hęc vero differentia ex eo nata est quod tertius & decimus canon codicis orientis Tiliiani qui incipit *ἐπιχόριοι* item quartus & decimus incipiens *οἱ δὲ χορεπίσκοποι* pro vnico canone duabus partibus siue periodis constante citantur in Photij Nomocanone. Ambo citantur ab eo pro vnico decimo tertio, scilicet, prior pars eius canonis titulo tertio capite quarto, & posterior titulo primo capite vigesimo nono. Balsamo verò Photij commentator libro secundo diuisit hunc decimum tertium canonem concilij Neocæsariensis ex duabus periodis compositum in duos canones, quibus diuisum & separatum commentarium subiunxit. Quæ res effecit vt vnicus canon in duos canones diuisus habeatur in codice orientis quem Tilius publicauit: Inde quo-

que factum est ut canon proxime sequens huius concilij, qui est decimus quartus in Nomocanone Photij titulo primo capite trigesimo, apud Balsamonem pro quintodecimo numeretur. Codex romanus vetus Moguntiae editus & Crisconius cum Photio conueniunt. Quare secundum antiquam rationem, quam secutum est concilium Calchedonense, Ancyranum constat quinque & viginti canonibus, & Neocaesariense quatuordecim: qui numeri coniuncti cum viginti canonibus concilij Niceni, viginti Gangrensis, sexdecim Antiocheni, efficiunt quinque & nonaginta: qui numerus tribuitur à concilio Calchedonensi sexto decimo canoni Antiocheni concilij: ut illum fuisse oporteat quintum & nonagesimum canonem codicis ecclesiae primitivae

vniuersalis. Atque hic est codex canonicus veteris ecclesiæ catholicæ, siue conciliorum quatuor œcumenicorum veterum, in quo restituendo & in lucem è tenebris reuocando veritatis amans hanc operam collocaui. Constabat omnino nouem conciliis. Primum omnium erat Nicænum quod duo diœceseon concilia, quamuis tempore priora, consequentur propter eius dignitatem, vt codex ipse antiquus docet: postea collocata erant tria diœceseon concilia, Gangrense, Antiochenum Calchedonensi actione octaua citatum. & Laodicense: compagem claudebant tria posteriora concilia œcumenica Constantinopolitanum scilicet, Ephesinũ & Calchedonense. Hic verò codex sũma veneratione ab ecclesia colendus videtur tanquã suũ instru-

mentum à corpore sacrae scripturae & authoritate & antiquitate secundum. Quamuis autem huius codicis iure vniuersa ecclesia regeretur, tamen Italia sibi eum velut proprium vindicauit, quod illum sui imperatores confirmauerant, & Pontifices romani, ut eius authoritas in Italia illaesa seruaretur, frequentibus postulationibus impetrauerant à principibus qui sunt in Italia rerum potiti. Fuit enim in more positum ecclesiae veteri catholicae, quae honore & obsequio suos imperatores colebat, ut cum conuenisset eorum mandato in concilia oecumenica quibus & illi per se vel legatos gloriosissimos magistratus & iudices praerant, definitiones suas cum literis ad principes mitteret quibus canones suos eorum potestati subiiciebat, illorumque confirmationem pe-

tebat. Huius generis epistola concilio constantinopolitano primo præposita est cum eiusdem sententiæ breui argumento. Eadem quoque inscriptio præfixa est concilio Constantinopolitano in Trullo, vt credere fas sit hâc fuisse solemnem omnibus veteribus cōcilijs formulã. Sed & post omnes imperatores Iustinianus Nouella 131. de quatuor ecumenicis cōcilijs & ijs quorum authoritas ab illis erat confirmata, sic statuit, *Sancimus vicem legū obtinere sanctas ecclesiasticas regulas quę à sanctis quatuor concilijs expositę sunt aut firmatę. Prędictarū enim quatuor synodorū dogmata sicut sanctas scripturas accipimus, & regulas sicut leges obseruamus. Quod ait, firmatę, regulas intelligit priorū conciliorū secundum quas de controuersijs ipsarū synodi generales iudicabāt, & codi-*

ce antiquo ecclesiæ continebantur. Sed & nouella 6. statuit vt episcopi ordinandi in medijs ordinationis solemnibus publice iureiurando promitterent se canones conciliorum seruaturus. Secundum eam pontifices romani ordinandi iusiurandum præstabant ad formulam constitutionis Iustiniani de ecclesiasticis regulis, cuius formulæ verba Gregorius pronuntiat can. sicut. distin. 16. *Sicut sancti euangelij*, inquit, *quatuor libros, quatuor concilia suscipere me & venerari fateor*. Imo etiam hæc se seruaturum vsque ad vnum apicē iurat papa, can. sancta. distin. 16. Quam veteris formulæ iurandi pontificij partem esse cardinalis Deusdedit affirmat in sua canonum collectione, quam haberi in bibliotheca vaticana narrant ad canonē sancta, romani recognitores codicis

Gratiani. Non potest igitur Pontifex romanus iure contendere se canonibus illis conciliorum superiorem esse, nisi sibi supra quatuor euangelia potestatem arroget: Cuius veritatis testes sunt antiquissimi Pōtiffices romani antequam in eam tēporalem potestatem quam deinceps sibi compararunt, deuenissent. Iuriiurando enim quod præstare debent conuenientissima est ingenua Zosymi papæ confessio, qua can. contra statuta 25. q. 1. ad episcopos Galliæ scribens canonibus cōciliorum inferiorem & subditam esse romanæ sedis potestatem agnoscit. *Contra statuta, inquit, patrum condere aliquid vel mutare nec huius quidem sedis potest authoritas. Apud nos enim inconuulsis radicibus viuit antiquitas cui statuta patrū sanxere reuerentiā. Quare codex canonum ecclesiæ ca-*

tholicæ qui ex concilijs œcumenicis prioribus & cæteris quæ sunt ab illis confirmata, cōpositus est, pars est iuris Iustiniani, & cū illo perfectè conueniens, qualis est partis cū toto summa consensio : & in eo iure, cui a romano pontifice derogari non potest, posita est ecclesiæ & omnium principum & populorū Italiæ libertas. Neque hæc ideo assero vt omnē auctoritatem posterioribus concilijs œcumenicis abrogandam esse existimē. Cum primū enim à principibus suscepta sunt, seruāda quoque sunt, sub hac tamen exceptione generali ecclesiæ catholicæ, quæ cōtinetur can. 28. dist. 50. can. hoc ipsum 33. q. 2. quorum canonum verba sunt hæc, *Quotiescunq; in gestis cōciliorū discors sententia inuenitur, illius concilij magis teneatur sententia, cuius aut antiquior aut po*

*tior extat authoritas . Institutio quoq;
iuris canonici pontificū romanorum
mādato scripta lib. I . tit. 3 . sic habet .
Alia vero cōcilia quæ ductu spiritus san-
cti congregata et celebrata fuerint , proxi-
mū ab istis (quatuor primis) sibi locū vin-
dicāt . Quod si quādo inter ea discors sen-
tentia inueniatur , illius sentētia magis est
tenenda cuius antiquior & maior est au-
thoritas . Ex hac regula potior est au-
thoritas concilij œcumenici quam
cōcilij diœceseos , huius quoq; quam
concilij prouinciæ , & huius quā con-
cilij ciuitatis . Sed cum duo concilia
œcumenica inter se discordātia com-
parantur , vincit authoritas antiquio-
ris , in his scilicet rebus quæ ad fidem
pertinent & in præcipuis regulis quæ
quasi fundamenta sunt & colūnx li-
bertatis & disciplinæ cum ipsa eccle-
sia natæ , nō in cæteris leuioribus quæ*

pro varietate locorum & temporum
possunt inmutari. Quam disciplinā
& libertatē ecclesia catholica in con-
cilio Ephesino can. 6. scriptis aposto-
licis, statutis patrum & antiqua con-
suetudine cōprehēdi prædicat, quam
attentari vllius ecclesiæ pastoris, ausu
vel conatu nefas est, *ne forte, ait conci-
lium, sub specie administrationis rerū sa-
crarū typhus potentia in ecclesiam sese in-
sinuet, sensimque imprudētes libertatem
eam amittamus, quam dominus noster Je-
sus christus omniū liberator suo sanguine
pretioso nobis largitus est.* Hæc est itaq;
generalis ecclesiæ definitio canoni-
bus antiquis cōprehensa, priores ca-
nones derogare posterioribus in re-
bus fidei & præcipuis regulis discipli-
næ cum ecclesia natæ: secus ac in re-
bus ciuilibus fieri solet, in quibus iura
posteriora prioribus derogāt. Secun-

dum hæc admissiones conciliorum posteriorum à quibusdã principibus factę interpretationẽ recipere debẽt, vt intelligantur admissa cõcilia salua ecclesię catholicę perpetua definitione, quę inesse semper, etiam si non sit expressa, intelligatur. Sic episcopi Galliarũ qui fidẽ imperatori Ludouico Pio datam seruabãt, neque in partes coniuratorum filiorum cum papa aduersus imperatorem transiuerant, contra noua quædam iura exceptione vtebãtur his verbis cõcepta, ni aliter se habeat antiquorum authoritas canonum. Quæ exceptio expressa etiam est beati Ludouici regis Frãcorum pragmatica sanctiõne quæ in omnibus editionibus pragmaticæ Caroli septimi, illi subiecta est. Ea sanctiõne statuit Ludouicus vt ecclesia canonibus conciliorum ecclesię dei

regeretur, illis nimirum quos veteres sancti patres fecissent. Cum ergo naturalis libertas Italiæ posita sit in sacra scriptura, in codice canonum antiquo ecclesiæ catholicæ, in iure iustiniano, & in posterioribus concilijs quæ veteribus non aduersantur neq; in fide neq; in regulis libertatis cum ecclesia natæ, superest vt disceptatio fiat cōtrouersia inter sanctitatē Pauli quinti & serenissimam rempublicā ortæ ex iuribus illis Italiæ, quæ de hac tāquam legitimi & æqui iudices pronunciare debent.

Vt vero dicā de primo controuersia capite, quod est de foro criminali clericorum, repetenda est paulo altius distinctio facta in imperio romano duorum vitæ generum, ciuilis & ecclesiastici. Subditi imperio romano in milites & paganos distincti

-fuere, unde nata diuifio negotiorū,
delictorum, pœnarum, iudicum ciui-
lium & militariū. At religione Chri-
ftiana fufcepta alia duo genera homi-
num facta funt, clericorum & laico-
rum. Clerici funt militibus compara-
ti, fcilicet milites Chrifti militibus fe-
culi. Paulus 2. Tim. 2. *labora*, inquit,
sicut bonus miles Iefu Chrifti: nemo mili-
tans implicat fe negotijs secularibus vt ei
placeat cui fe probauit. Cū iure romano
Paulus confentit. Militares viros, ait
lex, ciuiles curas fufcipere prohibe-
mus. l. militares. C. de re milit. Sequu-
tus Paulum eft imperator cum ait l.
reperita. 41. C. de epis. & cler. abfur-
dum imo etiam opprobriofum efle
clericis, fi fe peritos velint oftendere
difceptationum efle forenfium. Se-
quutus eft etiam apoftolum pōtifex
romanus qui clericos operam iuri ci-
uili

uili dare prohibet cap. ult. ne clerici
secularia negotia tractent. Sine cuius
iuris cognitione nullus iudex satis pe-
ritus esse potest cognitionis rerum se-
cularium siue ciuiles sint siue crimi-
nales. Distant enim inter se maximè
hæc duo corpora, respublica & eccle-
sia, ciuile etiam vitæ genus & eccle-
siasticum. Quæ differētia distinctio-
nem quoque fecit inter negotia deli-
cta, pœnas, iudices ciuiles & ecclesia-
sticos, Et vt apostolus vetat ne clerici
curis secularibus se immisceant, sic et-
tiam rerum ecclesiasticarum eos par-
est curam habere. Cum sit enim fi-
des in Iesum Christum, & ex fide na-
ta credentium ecclesia & societas sua
disciplina constans, etiam regibus in-
uitis, ex præcepto apostoli in his re-
bus deo potius quam hominibus obe-
diendum est. Ipse quoque Paulus hæc

eandem feruat differentiam rerū humanarum siue ciuiliū aut secularium & ecclesiasticarum siue spiritualium. Quantum ad causas ciuiles attinet, omnes christianos hortatur vt controuersia de ijs rebus inter eos orta arbitrio eorū quos partes elegerint, qui non ex presbyteris sumantur sed ex peritis iuris humani, dirimantur: earum enim rerum cognitione clericos abstinere iubet. Quod attinet ad criminales causas de quibus arbitri non accipiuntur, duo sunt insignia apostolica praecepta, alterum Petri, alterum Pauli, coniuncta à Gratiano sub can. magnum i. i. q. i. quia illis locis duobus vnum & idem praeceptum continetur. Hoc praecepto iubentur omnes mortales vt se subijciant potestati gladij quā dedit deus principibus & potestatibus supremis

ait Paulus, regi vt supremo ait Petrus ad coercionē facinorosorum. Adijcit Petrus libertatem omnem huic iusso contrariam fore velamen malitiæ, asylum scilicet & protectionem quandam scelerum, Paulus lasciuiam fore carnis. Vera enim libertas christianorum, inquit Petrus, est seruire deo & huic mandato quo regum gladio subijci illis præcipitur. Cum iurisconsultis romanis hi apostoli, maximè verò Paulus natus ciuis romanus, planè consentiunt. Primum aiunt ἀρχὴν ὑπερέχουσαν magistratum supremū, quem Aristoteles ἀρχὴν κυριωτάτην τῆς πάντων dominum omnium uocat. Ait Paulus, hic magistratus Δίαταγὴ θεῶν constitutio Dei, Petrus κτίσις ἀνθρώπων constitutio humana. Verba iurisconsultorum sequitur Paulus, seruitus est constitutio iuris gentium. Sic

apostoli, regia potestas est cōstitutio rerū humanarum à Deo facta. Deinde dicunt apostoli magistratū supremū habere ἐξουσίαν τῆς μαχαίρας εἰς ἐκδίκησιν τοῦ κακοποιούντος, iurisperiti vero potestatem gladij ad animaduertendum in facinorosos homines. Ait Paulus magistratum supremum gestare gladium. coercionis causa, hoc, forte, ideo quia princeps solus & quædam maxima potestates, ut præfectus prætorio & qui vicariam præfecturam administrabant, sedebant in cognitionibus habitum militare induiti & cingulo militari cincti. Tum etiam quia potestas gladij & omnis coercitio criminis, legis fuit apud romanos non iurisdictionis neque magistratus. Aiunt apostoli laudi bonorum non tantum coercionis improborum: Sic Iurisperiti, bonos, inquiunt, non

tantum metu pœnarum sed præmio-
rũ quoque exhortatione efficere cu-
pientes. Aiunt apostoli omnem ani-
mam subijci. Gratianus sub can. ma-
gnum 11. q. 1. ait omnibus clericis
præceptum esse à Petro: Atqui Petrus
ipse initio epistolæ ait se scribere ad
omnes sanctificatos in Christo. Aut
ergo ex illis non sunt clerici, aut hoc
præcepto continentur. Paulus dicit
se omnibus sanctis qui Romæ erant
scribere, id est ecclesiæ romanæ, qua-
re aut sanctorum appellatione non
censentur clerici, vel illis quoq; præ-
ceptum est ab apostolo. Sed ingenue
agnoscit Pelagius papa ad Childeber-
tum regem Francorum Clodovei fi-
lium scribens, *Regibus, inquit, nos esse
subditos, sacræ scripture præcipiunt.* cā.
fatagendum 25. q. 1. De sua & ponti-
ficũ romanorũ persona loquebatur.

Cum ait, sacræ scripturæ, hæc apostolorum præcepta intelligit notissima & quæ in omnium christianorum ore versabantur. Longe secus ac romani scriptores huius ætatis qui publice profitentur clericos non esse regibus subditos. Secus etiã ac libellus aphorismorum Romæ probatus qui asserit clericos committere non posse crimen maiestatis in principes temporales quod illis non sunt subditi. Quæ doctrina est pestis & euersio rerû publicarum, quas, cum ex iustitiæ regulis sunt cõstitutę, gratissimas esse deo agnoscunt etiam pagani solo lumine naturali edocti quod illucescit omni homini venienti in hunc mundum. Quare ex apostolorum duobus locis coniunctis regia vel suprema potestas nihil aliud est quam constitutio dei qua omnes mortales iurisdictio-

ni regum subijciuntur in eam rem vt boni laudentur, improbi coerceantur. Hæc sunt quæ ex iure diuino sumpta pertinet ad primum caput huius controuersia. Codex canonicus veteris ecclesiæ vestigia apostolorum sequutus est. Quod enim Paulus christianos hortatur vt controuersia eorum, sententia arbitrorum iudicentur, id vetus ecclesia trāstulit in clericos. Nec tantum id comprehenditur codice ecclesiæ catholicæ sed & codice vetere romano. Hi duo codices præcipiunt vt à litibus inter se abstineant clerici: Si quæ oriatur, ad episcopum eant, cuius suasu arbitros eligāt quorum sententia quod æquū & bonum sit de controuersia eorum statui, discant, antequam iure in foro congregiantur. Hoc præcipitur canone 9. concilij Calchedonenfis qui habetur

utroque codice & ecclesiæ, & veteri romano. Canonis verba latina sunt hæc in codice romano, *Si quis clericus aduersus clericum habet negotium nõ deserat episcopum proprium & ad secularia conuolet iudicia: sed prius actio vñtiletur apud episcopum proprium, vel certè consilio eiusdē episcopi apud eos quas vtraque pars elegerit quæ ad litē pertinent discutiantur. Si quis autem præter hæc fecerit canonicis correctionibus subiacebit. Quod si clericus habet causam aduersus episcopū proprium vel aduersus alterum, apud synodum prouinciæ iudicetur. Quod si aduersus eiusdem prouinciæ metropolitanū episcopus vel clericus habet querelam, petat primatem dioceseos aut sedē regia vrbis constantinopolitana & apud eum iudicetur. Hoc canone iubentur clerici de controuersijs inter eos natis ad episcopum ire. Nec tamē hoc canone*
vlla

Vlla fit imminutio iurisdictionis magistratus, vt docetur hac voce, prius, quam si ex hoc canone auferas, falsam ei affinges sententiam & menti ecclesiæ contrariam, vt faciunt qui nihil ex hoc canone citant præter hanc partem. *Si quis clericus aduersus clericum habet negotium, non deferat proprium episcopum & ad secularia percurrat iudicia.* Liberum itaque relinquit hic canon de cōtrouersijs tantum inter clericos ortis factus, illis post sententiā arbitri, si ei stare noluerint, iudicio corā magistratibus contendere sine pēna & sine appellationis necessitate: quāto magis libertatē non adimit laicis, de quibus nihil statuit, clericos coram magistratibus conueniendi. Hic canon qui comprehensus est & codice canonum ecclesiæ vniuersæ, & codice veteri romanę ecclesię, vsum ec-

clesiæ catholicæ nos docet vsque ad
codicem Gratiani. Burchardi enim &
Iuonis collectiones omitto, quia pri-
uatae fuerunt, nec ex illis sunt vnquam
citati canones. Hæc de actionibus
ciuilibus quæ in clericos exercentur
dicta sint. In criminalibus, codex ec-
clesiæ primitiua separauit etiam ac-
cusationes & crimina ecclesiastica
clericorum a ciuilibus can. 6. concilij
Cōstantinopolitani, quod inter prio-
ra quatuor œcumenica secūdum est.
Hic canon summa cū prudentia con-
stituit qui admitti ad accusationem
clericorum debeant & qui reiici: si-
mul etiam cognitionem de crimini-
bus ecclesiasticis clericorum tribuit
episcopis, neque aliā præterea: Eius
sunt hæc verba. *Quoniam multi qui ec-
clesiasticum ordinem confundere & euer-
tere volūt, causas aliquas odiose & calū-*

niosè aduersus gubernatores ecclesiæ orthodoxos episcopos confingunt, nihil aliud molientes quam vt existimationem de sacerdotibus impurā faciāt, & tumultus in populis pacificis excitent: hac de causa placuit sancto concilio episcoporum qui Constantinopoli conuenerunt, accusatores non recipi absque aliqua inquisitione, neq; omnibus permittere vt ecclesiæ gubernatores accusent, neque etiam omnibus prohibere. Si igitur aliquis priuatam querelam aduersus episcopum mouerit quod ab eo fraudatus aut aliquid præter ius passus sit, in huiusmodi accusationibus non inquiratur neque de persona neque de religione accusatoris. Oportet enim conscientiam episcopi liberam esse, & eum qui se iniuria affectum dicit suum ius consequi, cuiuscunque religionis fuerit. Si autem crimen (εὐ-
χλυστα) cuius accusatur episcopus, fuerit ecclesiasticum, tum accusatorū personas æsti-

mare accensere oportet. Dein enumeratis personis quæ ab accusatione clericorum repelluntur, sic ait. Si vero aliqui neque aliquorum criminum accusati neque damnati neque heretici neque excommunicati fuerint, dicant autem se habere accusationem (κατηγορίαν) ecclesiasticam aduersus episcopum, hos sancta synodus iubet instituere primum accusationem coram omnibus prouinciæ episcopis & coram illis arguere crimina episcopi delati. Si vero episcopi prouinciæ crimina quæ intendantur diiudicare non potuerint, tum accedant accusatores ad maiorem synodum episcoporum illius dioceseos, qui hac de causa conuocati fuerint. Accusationem autem non instituunt antequam scripto pari periculose subiiciant si inueniatur in accusatione calumniosè egisse. Si vero sprete his quæ eo quo iudicauimus modo statuta sunt, ausus fuerit regias aures obtundere & in

*dicta principum secularium vel synodum
œcumenicum turbare, contumeliosè con-
temnēs omnes eius diœceseos episcopos, hic
omnino ad accusandum nō suscipiatur ut
pote qui iniuriam infert canonibus & or-
dinem ecclesiasticum perturbat. Canon
hic clare accusationes criminum ec-
clesiasticorum quę à clericis admit-
tuntur, à ceteris distinguit, earumque
cognitionem synodo episcoporum
tribuit, neque quicquā statuit de cri-
minibus quę causam continent pu-
blicorū iudiciorum, ex quorū causa
accusandi unicuique ex populo po-
testas permessa est, & quibus publicis
iudicijs salus reipublicæ maximè cō-
tinetur. Ait canon ecclesiasticum (ἐκ-
κλησιαστικόν) crimen more Iurisperitorū
qui dicūt delictum militare l. 2. ff. de
re militari, cuius sunt hæc verba. *Mi-
litū delicta siue admissa aut propria sunt**

aut cum cæteris communia: vnde & persecutio aut propria aut communis est. Proprium militare est delictũ quod quis vti miles admittit, & in l. 6. ff. eo. omne delictũ est militis quod aliter quam disciplina communis exigit, committitur: Veluti segnitia crimen, vel contumacia, vel desidia. Eandem loquendi formã sequitur concilium, & crimen ecclesiasticum vocat quod contra disciplinam ecclesiæ committitur. Eadem est pœnarum differentia, aliæ enim ecclesiasticæ sunt seu spirituales, aliæ vero temporales, illæ in canonum, hæ in legum sunt potestate. Criminibus civilibus canones non irrogant pœnas præter eas quas vocant penitenciales ad forum dei solummodo pertinentes, quamuis leges principum qui nutritij, prætores, protectores, pastores & episcopi exteriores ecclesiæ à deo

constituti sunt, criminibus ecclesiasticis pœnas statuunt eo iure quo de rebus cæteris ecclesiæ, leges facere possunt adiuuandi, exequēdi, defendendi iuris diuini & canonici causa cuius custodia illis est à deo mandata. Episcopi iudices sunt criminum ecclesiasticorum quæ pœnis canonicis coercent. Quod si grauitas criminis pœnam canonicam superet, degradatum reum episcopus magistratui tradit, pœnis legitimis quæ pares sint crimini præterea puniendum, velut cōstituit Heraclius. Vt autem crimina & accusationes ecclesiasticas distinguit Calchedonense concilium à cæteris: Ita & Iustinianus Nouella 83. §. si tamen, quæ constitutio in codicem Gratiani relata est can. si quis 11. q. 1. Ea constitutione Iustinianus criminū ciuiliū & ecclesiasticorum differentiam sequutus in eadem ge-

nera diuidit iudices & pēnas, ciuiles
scilicet & ecclesiasticas. Crimina ciui-
lia ciuitatem vel rempublicam lædūt
vt furtum, homicidium, quorum cri-
minum executio magistratibus rei-
publicæ data est. Ecclesiastica disci-
plinam ecclesiæ lædunt & eorum co-
gnitio in clericos ad ministros eccle-
siæ pertinet, vt vnusquisque de re sua
cognoscat, ab aliena abstineat. Italia
Noellas Iustiniani cognouit ex in-
terpretatione Iuliani antecessoris qui
eas latinas fecit. Sic autē hanc de qua
loquor constitutionem reddidit. *Si
quis cū clerico de criminali causa litigium
habuerit, crimen aut sit ciuile, tunc com-
petentes iudices in hac ciuitate vel in pro-
uincijs interpellati consentaneum legibus
terminū causis imponāt. Sin autē crimen
ecclesiasticum est: tunc secundum canones
ab episcopo solo causæ examinatio et pœna
procedat,*

procedat. Coercet hæc Nouella episcopi iurisdictionem intra certos fines vt cognoscat de crimine ecclesiastico quod admisisse dicitur clericus pœna canonica puniendus. Quare vt cognitio criminalis episcopica canonibus conueniat, necesse est eiusdẽ generis sint iudex, reus, crimen, pœna, scilicet hæc omnia ecclesiastica esse debent. Accusationum vero criminum priuatorum quæ ab ijs instituuntur qui suum dolorẽ suamve iniuriam persequuntur, concilium Constantinopolitanum parte prima canonis sexti meminit, sed earum cognitionem præcise synodo non tribuit. Mens enim & sententia concilij cum iure romano concordat quo huiusmodi accusatores accusationes corã episcopis instituere possunt, sed inuiti non coguntur. Quod refert cõstitu-

tio græca Iustiniani l. θεοπίζομεν υμῶν
 C. de episc. aud. quæ de foro clerico-
 rû qui accusantur facta, fere per om-
 nia imitatur canonem 6. concilij Cō-
 stantinopolitani tam in gradibus epi-
 scoporum & synodorum constituen-
 dis quam in distinctione criminû ec-
 clesiasticorû à civilibus. Huius legis
 §. τὰς δὲ αἰτίας hęc sunt verba. *Has autē
 actiones si quidem ad ecclesiastica negotia
 pertinent necesse fore iubemus ut à solis
 religiosissimis episcopis aut à sacris syno-
 dis aut à sanctissimis patriarchis cogno-
 scantur. Si vero sit civilium rerum contro-
 versia volētes quæstionem apud antistites
 instituere patiemur, inuitos tamen non co-
 gemus, cum iudicia civilia sint, si ea adire
 malint, apud quæ licite etiā de criminibus
 cognoscere. Ostēdi ex iure diuino, ex ca-
 nonibus primitiæ ecclesiæ, & con-
 stitutionibus Iustiniani cognitionem*

rerum secularium clericis non competere, item criminum ecclesiasticorum, quorum clerici accusantur, cognitionem episcopis esse canonibus & legibus tributam, cognitionis vero de criminibus priuatis clericorum, episcopos non esse competentes iudices nisi ex consensu accusatorum. Criminum autem publicorum, de quibus mihi restat dicendum, cognitionem nulla lex, nullusque canon vetus tribuit episcopis. Hoc enim contra rationem iuris romani fuisset, quia nulli iudices, nulla poena, nullique accusatores horum criminum in foro ecclesiastico reperiuntur, quod mihi sigillatim probandum est. Primum quod attinet ad iudices, si quis est qui existimet criminum publicorum quibus in rempublicam peccatur, coercionem episcopis datam fuisse, quam ne quidem

magistratibus suis ut magistratibus
committebant, ei certe non satis est
perspecta romanorum veterum sapiē
tia. Solebant enim ex sapientū prae
ceptis, in criminū coercitione maxi
mam potestatem legi, minimā vero ma
gistratibus tribuere. Duo sunt coerci
tionum genera: aliud mulcta dicitur
quæ est in iudicantium arbitrio, aliud
pœna quæ legitima est. Primum nec
mulctæ ipsius dictio olim alijs quam
consulibus data est, lege Atinia magi
stratibus urbanis cōmunicata fuit. Re
publica in principatum versa, manda
tis principum data fuit magistralibus
prouincialibus & municipalibus. Sed
& hodie ex iure Iustiniano plures
magistratus limitatam non plenā ha
bent multæ dictionem, teste titulo co
dicis de modo mulctarum quæ a iu
dicibus infliguntur: pœnæ vero om

nes capitis, famæ pecuniæ, legitimæ fuerunt. Quare multa dicitur & infligitur à iudice: pœna dicitur à lege, irrogatur ab eo cui criminis siue delicti executio competit l. 131. l. 244. ff. de verb. signifi. Sed & magistratus qui cognoscit de crimine, de facto tantum cognoscit, an Titius Mæuium occiderit, de pœna non pronuntiat: quod si pronuntiet inanis est illa pronuntiatio, pœna enim irrogabitur legis non sententiæ auctoritate. Nā ut Papinianus ait *facti quidē questio est in arbitrio iudicantis, pœnæ autē persecutio non eius voluntati mandatur*, sed legis auctoritati reservatur. l. 1. §. quorum. ff. ad SC. Turpil. Quare etiam a pœna non appellatur, a lege enim, quæ de pœna pronuntiat, prouocatio non est. Quod si magistratus cognoscens de pœna statuere

non potest, quo iure episcopus de ea pronuntiabit? Hodie quoque ex iure iustiniano pœnæ capitales quibus vita, libertas, ciuitas amittitur a lege cōstitutæ, immutari arbitrio iudicantium non possunt. l. ordo ff. de publicis iudicijs. Confiscandi etiā potestas non nisi maximis iudicibus data est tit. cod. ne iniussu principis liceat certis iudicibus confiscare. Pœnæ quoque non capitales arbitrariæ quidem sunt non tamen plenum illarum & liberum arbitrium habent iudices sed legitimæ pœnæ quodammodo astrictum. Cum enim plures gradus sint pœnarum, exque pœnæ omnino temporales, capitis, famæ, damni pecuniarij: omnes sunt extra potestatem liberam magistratus, qui si a legitima recedat, proximas legitimæ eligere debet siue ad seueritatē siue ad leni-

tatem declinās. *Hodie*, inquit, iurisconsultus, *licet ei qui extra ordinē cognoscit de crimine quā vult sententiam ferre vel grauiorē vel leuiorē, ita tamē vt vtroque modo rationem nō excedat* l. *hodie*. ff. de pœnis. Sed & alibi iurisconsultus sic ait, *in leuioribus causis prouiores ad lenitatem iudices esse debent, in grauioribus pœnis seueritatem legū cum aliquo temperamento subsequi*. l. *perspiciendū*. ff. de pœnis. Hoc vero arbitrium discedendi a legitima pœna & aliam ex proximis pœnis eligendi ad eum tantum pertinet cui legitimæ irrogatio competit, cum sit illud arbitrium electio vnius ex pluribus pœnis temporalibus quarū nulla est in arbitrio episcopi. Nec tantū in pœnis lex ita dominatur, verum etiā cognitio ipsa facti quæ a lege datur, non datur magistratui vt magistratui, sed vt cuilibet cum etiā

priuato dari possit: Definitio enim iuris romani est, criminũ publicorum coercitionem non esse iurisdictionis neque magistratus, sed legis quæ dat eam non vt partẽ iurisdictionis magistratus, sed vt merũ imperiũ quod commissionem forẽsi verbo nuncupamus. l. 3. ff. de iurisdic. omni. iud. Cuiacius Obserua. lib. 21. cap. 30. Quod si sola facti cognitio de crimine publico quod clericus admisit, nõ est pars iurisdictionis magistratus, qua ratione pars cẽsebitur ministerij episcopalis? Quod si criminũ publicorum coercitio est in potestate legis solius, quæ vnquã constitutio vel gratia & ambitione impetrata contra canones ecclesiasticos, vt imperatorum verbis vtar, clericos soluit legibus & potestate principis? Quare nullus est iudex in foro ecclesiæ cui potestas da-

ta sit coercendi crimina publica, sed nec vllæ sunt pœnæ in eo foro quæ illis criminibus coercendis conueniāt. Episcopi enim secundum canones iudicare debent & pœnas canonicas infligere. Neq; vero codice primitiuæ ecclesiæ, neq. codice vetere romano vlla pœna est constituta criminibus publicis quibus respublica violatur, sed quæ sunt ijs codicibus pœnæ cōprehensæ, delictis ecclesiasticis solum imponuntur. Pœnas sane concilium Ancyranum can. 15. & 16. imposuit quibusdā criminibus publicis sed pœnitentiales quæ authoritati magistratuum derogare nō possunt vt nec iurisdictione quæ dicitur pœnitentialis cōfessoris dati morte damnato, sententię executionē impedire potest. Sed nec vllus accusator criminum publicorū in foro ecclesiastico inuenitur:

accusationes enim & crimina aut publica aut priuata sunt. Publicas accusationes instituere olim cuiq. ex populo potestas data est vnde publicorum iudiciorum nomen descendit. Nunc vero hoc munus datum est in foro seculari procuratori regio vel fiscali, quale nullum est munus in foro ecclesiastico constitutum. Nam qui promotor dicitur, vtilitatis cleri vel disciplinæ ecclesiæ defensor est, non iuris reipublicæ cuius defendendæ munus ei non dedit episcopus nec vero dare potuit. De re publica enim statuere regum est non episcoporum. Ideo promotor ab episcopo constitutus ius reipublicæ in iudicium deducere non potest, cuius vtilitati potissimum ratio habetur in accusationibus quæ ex causa publicorum iudiciorum descendunt, cū etiam respu-

blica omnium princeps & domina in foro suo & coram suis magistratibus de suo iure litigare debeat. Quare in foro ecclesiastico nec iudex nec pœna nec accusator publicorum criminũ reperitur, quæ omnia sunt ad eorum coercionem necessaria. Hęc de accusationibus publicis. Priuatarum meminit prima pars canonis sexti cõcilij constantinopolitani quem supra retulimus. Eas volentes accusatores in clericos instituere possunt in foro episcopi vt & actores actiones ciuiles, nec possũt clerici accusati vel vocati fori præscriptionẽ obijcere can. 15. cõcilij carthaginensis. Hic canon codice veteri romanæ ecclesiæ continetur, ex quo codice maiores nostri quãdoque canones citauerunt: & sic habet, *itẽ placuit vt quisquis episcoporũ vel presbiterorum & diaconorũ seu cle-*

ricorum cū in ecclesia ei fuerit crimen institutum vel ciuilis actio fuerit cōmota, si relicto ecclesiastico iudicio publicis iudicijs purgari voluerit etiā si pro ipso fuerit prolata sentētia locum suum amittat, et hoc in criminali actione: in ciuili vero perdat quod euicit si locum suum obtinere maluerit. Huius canonis sanctissima mens est quę mihi aperiēda est, ne quis hoc canone ad imminuendā authoritatē magistratuum ciuiliū abutatur. Ait Seneca latiore esse officij quam iuris regulā huic sententię addi potest, latiorē esse officij ecclesiastici quam cuiusuis alterius regulam: maiorem enim sanctitatem & innocentiam clerici in contractibus suis & tota uita præstare debēt quam laici, ex iure diuino & canonibus Quod crimen non est pagano, pro crimine habebitur in milite seculi. Iurisconsultus ait. quædā

delicta pagano aut nullā aut leuiorem pœnam irrogant: militi vero grauiorem: nam si miles artem ludicram fecerit, vel in seruitutem se venire passus est capite puniendum Menander scribit .l. quædam 14. ff. de pœnis. Quare in foro seculari ex legibus ciuilibus absoluendus clericus, in foro ecclesiæ quæ ex lege diuina iudicat dānari debebit. Idcirco in causa criminali vel ciuili vocatum clericum ad forum ecclesiæ respondere iubet synodus, quamuis actor vel accusator in eo agere vel accusare non cogatur l. δεσπίζουεν μηδένα . C. de episcop. aud. Sed nec reus clericus in causa ciuili, post arbitri inter clericos accepti sententiam, prohibetur ius publicum inuocare & ad magistratum ire ex canone nono concilij Calchedonenfis qui supra relatus est. Quare concordātia sunt inter se ius canoni-

cum veteris ecclesiæ catholicæ & iustinianæ, quorum de foro clericorum accusatorum hæ sunt definitiones certissimæ: Accusationum ecclesiasticarum episcopos esse competentes & necessarios iudices: civiliū priuatarū incompetētes esse nisi ex consensu accusatorum: publicarum prorsus & omnino esse incompetentes. A temporibus iustiniani latæ sunt de ea re duę constitutiones, altera Heraclij imperatoris quæ in collectione iuris oriētalīs habetur, altera Federici imperatoris in occidente quæ in codicē iustiniani relata est. Heraclij constitutio ad Sergium patriarcham Constantinopolitanum scripta duo capita præcipua continet. Priore actionū civiliū earū quæ sunt pecuniariæ (χρηματικά) aduersus clericos motarum cognitionē episcopis tribuit, quo in lo-

co pecuniæ verbum propria & stricta
significatione accipitur. Cuius capi-
tis ratio est quod earū controuersia-
rum quæ mere personales sunt puta-
uit Heraclius iudicium facilius esse
neque iuris ciuilis cognitione admo-
dū indigere, cuius perfecta cognitio
episcopo non est satis conueniens.
Quod etiam seruatum fuisse tēpore
Gratiani arguit, quod ipse ex prædio-
rū possessionibus clericos imperato-
rum potestati subiicit 2. parte 1. q. 2.
ex sententia Augustini can. 1. dist. 8.
quam a maioribus acceptā regulam
Carolus quintus rex Francorum qui
sapiēs cognominatus est retulit in li-
brum iussu eius factū & somnij viri-
darij nomine inscriptū, qui olim de-
creto curiæ parisiensis Iulij secūdi pon-
tificis tēporibus typis excusus est: his-
que verbis concipitur regula, ecclesiā

Gallicanam in tēporalibus regi sub-
esse. Huic iuri Heraclij conuenit &
cōstitutio Francisci primi regis fran-
ciæ qui edicto lato 1535. clericos ad
forū episcopi remitti iubet in actiōni-
bus mere personalibus, hoc est pecu-
narijs nihil realitatis habētibus ut fo-
rensi verbo utar. Altero capite consti-
tutionis Heraclij quod est de foro cle-
ricorum accusatorum limes ille posi-
tus canonibus & legibus inter utrū-
que forum, qui separat crimina eccle-
siastica a ciuilibus, nō est sublatus ne-
que motus verbis vel sentētia consti-
tutionis: sed tantum patriarchæ Cō-
stantinopolitani ius auget & aliorum
episcoporum minuit. Statuit enim vt
de clericis qui Constantinopoli repe-
rientur & rei fiēt criminum, cuiuscū-
que fuerint illi diœceseos cognoscat
patriarcha Constantinopolitanus &
eos

eos pœnis canonicis coerceat quæ si pares criminibus non fuerint, clericos depositos magistratui tradat pœnis legitimis puniendos. Non omnium criminum dicit accusatos clericos ad forum patriarchæ Constantinopolitani pertinere, sed simpliciter criminum accusatos, quod intelligendum secundum regulam vtriusque iuris, eorum scilicet de quibus cognoscit episcopus. Quare neque expresse neque tacite limes vtriusque fori motus fuit. Expressis autem verbis in tanta re & tam magna iuris mutatione, opus fuisset. Dein iubet secundum canones reum iudicari quibus nullæ criminibus civilibus sunt impositæ pœnæ vt dictum est. Si ecclesiastici criminis gravitas pœnas canonicas superet, vt interdum accidere potest, iudici seculari tradi

iubet reum depositum ut secundum leges, quæ poenas irrogant criminibus civilibus & ecclesiasticis, coerceatur. Fœderici vero imperatoris constitutio ius nouum non facit, imo vetus confirmat. Verat enim ne clerici tam in causa civili quam in criminali ad forum seculare trahantur contra canonicas sanctiones & imperiales constitutiones. Itaque nullo modo veteri iuri canonico & Iustiniano quod factum est de foro accusatorum clericorum derogatum est vel Heraclij orientis vel Federici occidentis imperatorum constitutionibus. Nunc dicendum mihi quo colore episcopi ab antiquis temporibus ordinem iudiciorum seculariū in his cognitionibus turbarūt. Quæsitus fuit color ab exauetoracione clericorum damnatorum quam fa-

cere solebant episcopi. Qui mos neque ex codice primitivæ ecclesiæ catholicæ neque ex veteri codice romanæ ecclesiæ descendit. Sed ex cōstitutionibus imperatorum exauctoratio militaris in ecclesiā est propagata. Quibusdam pœnis coerceri milites non poterant nisi exauctorati l. pœnæ l. proditores. ff. de re militari. Eundem honorem consequuti clerici sunt quem Iustinianus illis conferuat Nouella 83. sed ita ut clerici iam damnati darentur episcopo exauctorandi. Ea re factum ut causa non cognita exauctorationem renuerent episcopi ni probationum criminis inspiciendarum potestas eis fieret, quibus editis acta minus solemniter facta interdum causabantur, & criminum coercitio cludebatur. Cui malo ut mede-

retur Iustinianus constituit Nouella 131. vt magistratus ante condemnationem clerici, acta causæ episcopo ederet, qui si ea minus solemnia esse diceret, vterque & iudex, & episcopus ad eum de causa literis referrent, vt quod illi æquum esset visum statueret. Hæc est postrema Iustiniani constitutio de ea relata. Quamuis & illud gratia & ambitione datum episcopis contra canones videri potuisset, vt imperatorum verbis vtar in l. priuilegia. C. de sacros. eccles. *Pragmaticas*, inquit, *sanctiones quæ contra canones ecclesiasticos interuentu gratiæ vel ambitionis elicitæ sunt, robore suo & firmitate vacuatas cessare præcipimus.* Quare ius illud Iustiniani potius abrogatum oportuit vt sancti canones primæ ecclesiæ plane vige-

rent quibus prohibitum est, ut & iure diuino, ne episcopi rebus secularibus, siue ciuiles siue criminales sint, se immisceant. Neque enim Iustinianus hac Nouella distinctionem criminum ecclesiasticorum & ciuiliū sustulit, imo potius conseruauit. Nam eadem Nouella permittit episcopos ipsos ex autoritate tamen principis ad magistratus siue ciuiles siue militares produci & coram illis exhiberi. Quod non nisi, quantum ad crimina attinet, in ciuilibus criminibus fieri debet. Huius capitis verba apud Iulianum antecessorem sunt hæc. *Nullus episcopus neque pro ciuili neque pro criminali causa apud quemuis iudicem siue ciuilem siue militare producat vel exhibeatur nisi imperialis iussio præcesserit.* Quam constitutionem Italia cogno-

uit ex Iuliani interpretatione , dein ex codice Iustiniano , in quem Irnerius eam transtulit . Neque Italiae necesse fuit eam cognoscere ex falso quod perpetravit in ea Gratianus vel is quem Gratianus sequutus est , can. octauo , 11. quæstio. 1. vbi hæc verba (*nisi imperialis iussio præcesserit*) constitutioni adimuntur . At Gregorius 13. Pontifex Nouellam restituit constitutione sua recognitioni romanæ præposita , quæ sic ait , *iubemus ut quæ emendata & reposita sunt omnia quam diligentissime retineantur , ita ut nihil addatur , mutetur aut imminuatur .* Reddita vero est Nouellæ integritas sua , cum Gregorius iuris peritissimus in ora libri lectorem remittit ad codicem Iustiniani , vbi integra legitur . Eodem modo restitutionis usus est ad can. quinto ,

II. quæstio. I. in sananda depravatione rescripti imperatorij ad præfectum augustalem, quod cum de foro clericorum factum sit, integrum hic adijciam, *Continua lege sancimus nomen episcoporum vel eorum qui ecclesiæ necessitatibus seruiunt, ne ad iudicia siue ordinariorū, siue extraordinariorū iudiciū pertrahatur: habent illi suos iudices, nec quisquam his publicis commune cum legibus, quantum ad causas tamen ecclesiasticas attinet, quas decet episcopali authoritate decidi. Quibuscumque igitur mota fuerit quæstio quæ ad christianam pertineat sanctitatem, eos decebit sub eo iudice litigare qui præsul est in suis partibus omnium sacerdotum, Optate charissime & iucundissime. Quare laudabilis authoritas tua arbitrio temperato quidquid negotiorum aliunde incidet terminabit, habituro pontificium*

sacrae disceptationis Timotheo episcopo,
quem sibi omnes etiam suo iudicio præ-
tulere. Quare restitutiones harum
constitutionum à Gregorio 13. pa-
pa factæ testes sunt æquitatis quam
ferenissima respublica coluit in re-
tinendo iure antiquo, quod & ip-
si papæ integritati suæ dum red-
dunt, simul etiam probant & quo-
dammmodo eius usum restituunt.
Nec verò ius illud antiquum Italiæ
proprium, sed illi cum Gallia com-
mune fuit. Vtebatur illa codice
Alarici regis Gothorum auctorita-
te collecti, subiecta singulis legi-
bus interpretatione Aniani, ut ip-
se Alaricus testatur in commonito-
rio quod codici præposuit cum hac
inscriptione, Incipit lex romana:
quo commonitorie monet suum co-
dicem ab episcopis ipsis & cæteris
pro-

prouincialibus probatum & receptum. Subiecerat singulis legibus Anianus interpretationem, & ubi nihil habuit quod diceret, hæc verba legi subiunxit, Hæc lex interpretatione non indiget. His notis discerni possunt leges illius codicis a cæteris codicis Theodosiani in nouis editionibus, quæ illas simul cum cæteris codicis Theodosiani legibus complectuntur. Separatim editus fuit hic codex Alarici Basileæ anno 1528. sub nomine Codicis Theodosiani. Quod pars Galliæ vteretur hoc Codice, iamdudum dicta est patria iuris scripti. Sed tota ecclesia Galliarum hoc iure utebatur teste Ripuarianorum Francorum veteri lege quæ ait ecclesiam romanam lege vivere, teste etiã Hincmaro episcopo Rhemenfi qui citans romanam quandam legem hæc ver-

ba subiungit, hæc lex interpretatione non indiget: quod argumentum est eum legem ex codice Alarici citare. Comprehenditur hoc codice Valentiniani Nouella de foro clericorum cui Anianus subiecit hæc verba: *Si quis laicus clericū siue in civili siue in criminali negotio per authoritatē iudicis ad publicū prouocauerit, pulsatus sine dilatione respondeat. Episcopus etiam & presbyter siue pro peruatione rei alicuius, siue pro quibuscumque grauibus iniurijs ad iudiciū fuerint prouocati, licet in criminalibus causis per alium nulli liceat respondere, episcopis tamen & presbyteris hac lege testatur vt in talibus causis misso procuratore respondeant, sine dubio vt ad eos redeat sententia indicati. In reliquis vero criminalibus causis vbi de scelere persona conuincenda est, suā in iudicio præsentiam exhibere procurēt. Quod si tertio cōuenti*

per executores ad iudicium venire noluerint sententiã excipiet contumacis. Commitorio Alarici codici præfixo subiungitur, hunc codicem denuo publicatum fuisse, vt ex illo ius diceretur anno vigesimo Caroli regis Francorũ & Longobardorum Patricij romanorum. Quare vt Italia & Gallia eodem imperio continebantur eodem quoque iure vtebantur, quantum pertinet ad forum clericorum accusatorũ. Hoc autẽm ius idem erat cum iure canonum primitiuæ ecclesiæ vniuersalis & Iustiniano cui in hac re non est derogatum codice veteri romanæ ecclesiæ, quo iure ecclesiæ suburbicariæ romano episcopo subiectæ vsæ sunt vsque ad codicem Gratiani, qui agit de foro clericorum vndecimæ causæ quæstione prima. A qua quæstione si detrahas ea iura quæ gentibus

exteris tribuuntur & ad Italiam non pertinent, falsa iura reiicias, deprauata emendes secundum iussu Gregorii. 13. nihil supererit iuri antiquo contrarium. Maxime vero si canonem sextum concilii Constantinopolitani, qui codice primitiue ecclesie continetur, addas huic questione, qui omisus est ab ecclesia romana duabus de causis. Prior est quia cognitionem criminum ecclesiasticorum tribuit synodo provinciarum quam cognitionem pontifex romanus sibi vindicat. Posterior quia summam iudiciorum potestatem tribuit synodo dioceseon secundum antiquam ecclesie consuetudinem quam refert Iustinianus l. *ἡ ἐκ τῶν πατρῶν*. C. de episcop. aud. à maioribus, scilicet, traditum esse à patriarchis dioceseon non appellari, à quibus appellari se debere papa con-

tendit quo iure hodie vtimur. Quæ
fecutæ sunt Gratianum decretales e-
pistolæ non recipiuntur, quâ-
tinet ad forû clericorum a principi-
bus qui eas reiecerûnt vel cōtrario vsu
vel contrarijs cōstitutionibus. Quare
recte Venetia retinuit ius vetus quo
publicorû iudiciorû, etiam in accusa-
tionibus cōtra clericos institutis, epi-
scopi non sunt iudices competentes.

Venio ad secundum caput cōtro-
uersiæ quæ est inter sanctitatem Pau-
li quinti & serenissimam rēpublicam.
Illud est de senatusconsulto quo pro-
hibitû est ne nouæ ecclesiæ ædificen-
tur sine senatus assensu. Quæ quæstio
ab alia tanquam superiore pendet, v-
trum clerici ordinari possint sine ele-
ctione & cōsensu ecclesiæ totius, ma-
gistratuû & summi principis. Si enim
hoc fieri prohibent canones, simul e-

tiam sequetur multo minus nouas societates, corpora, collegia clericorū ordinari posse vel creari in ciuitate sine eorum cōsensu, vel foris ordinata & composita in alienam ciuitatem & rempublicā mitti. De qua quæstione mihi differendum est eo quē proposui ordine, ex iure diuino, canonico veteris ecclesiæ catholicæ & romano iustineaneo. Quod ad ius diuinū attinet, satis constat ex actis apostolorum electionem clericorum ordinandorum ecclesiæ fuisse, cōsecrationem verò episcopi & totius presbiterij. Hoc obseruari potest in electione quam fecit ecclesia, apostolis presbiterorum in vnaquaque ciuitate, & diaconorū quos locos scripturæ omnibus notos non recensebo. Ab hoc tā sancto iure non recessit canonicum, quod etiam testimonijs pon-

tificum romanorum probari potest. Imperium romanum diuisum erat in ciuitates & respublicas quarum territoria, vt geometrarum verbis vtar, totum solum imperij complebant vt nihil præterea superesset. Vnaquæque ciuitas suam habebat ecclesiam, suum presbiterium cui præerat episcopus. Quare regula est iuris apostolici, vnamquamque ciuitatem suum presbiteriũ habere debere, quæ deinceps in canonibus ecclesiæ & constitutionibus imperatorum his verbis est concepta: vna quæque ciuitas episcopum suum habeto. Constabat vero ciuitas ex pluribus ordinibus, primum ordine decurionum siue curialium cui præerant magistratus municipales, iudices scilicet ciuitatis, ordine honoratorum, idest, eorum qui honores in ciuitate gesserant, dein tri-

bus ordinibus in quos etiam hodie multarum gentiũ populi diuiduntur, ij sũt clerus, possessores, & plebs. Nobiles enim esse quos possessores iura vetera vocant, indicant plures epistole Gregorij primi ad possessores Sicilia scriptæ. Hi ordines varie collocati modo rēpublicā sub magistratibus municipalibus, modo ecclesiam sub episcopo efficiunt. Nulla sanctior actio in politica ecclesiæ celebratur præter conuentus ecclesiæ, ordinandorum clericorum causa ab episcopo conuocata. Stato tēpore & solemni post publicas ad deum preces & ieiunia, ordines ecclesiæ conueniebant: ij quorũ iam nomina palā facta, qui-que iam a viris peritis examinati erāt, proponebantur. Orationem habebat ad ecclesiam episcopus, qua ordines hortabatur ad electionē ordinandorum

rum

rum sincere tanquam deo coram, teste & iudice metuendo faciendam, cuius rei formulam exhibuit Clemens octuus papa in pontificali Romę edito. Sententias de singulis qui proponebantur cooptandi, ordines ecclesię dicebant. Sed prima fuit sententia ordinis magistratuum & decurionum, qui simpliciter in iure ordo dicitur. Ex omnium ordinum consensu seu conniuentia decretum totius ecclesię de admittendis ad ordinationem pronuntiabatur, electionem cōsecratio sequebatur, postremo gratijs deo actis comitia dimittebātur. Hęc forma ordinationis ex varijs iuris locis colligitur, vnico contētus ero qui est in codice Gratiani can. 6. dist. 24. eius verba sunt: *Episcopus sine cōcilio clericorum clericos non ordinet, ita vt ciuiū assensum & conniuentiā querat.* Con-

niuetia verò est consensus eius qui nõ
cõtradicit. Verbũ hoc, ciues, & alibi,
populus, non est ὄχλος turba, can. 13.
cõcilij Laodicensis quo abutũtur qui
laicos ab electionibus clericorũ ei-
ciunt. Populus in sacris canonibus &
in iuris locis est ciuitas seu respublica
quæ sine magistratibus nec esse nec
intelligi potest, cum primum locum
in ciuitate teneant. Populus, ait Cice-
ro in libris de Repu. referente Augu-
stino lib. 19. de ciuitate dei c. 21. *est*
cætus multitudinis iuris cõsensu & utili
tatis communione societas. Magistratus,
qui primi sunt in ciuitate & populo
primam sententiã ferunt, quia mores
ordinãdorum magis scire & cognos-
cere possũt. Hi magistratus principis
personam sustinent qui per eos eligit
ordinandos. Nouissimũ ius hanc for-
mam electionis etiam agnoscit, vt ex
oratione episcopi ad ordines manife

stū fit quæ est in pontificali Clemen-
tis cōtaui. Hæc est igitur ecclesię vni-
uersalis regula a Leone primo papa
pronuntiata in epistola ad Anastasiū
episcopum Thesalonicēsem quæ est
in codice romano vetere. Sic aut cō-
cepta est, Nullus inuitis & nō petēti-
bus detur episcopus, ille oībus præ-
ponatur quē cleri plebisque cōsensus
cōcorditer elegerint. In codice quo-
que Gratiani papa Nicolaus primus
ad episcopum Rauēnatem can. 13. di-
stin. 63. sic ait. *episcopos nō consecres nisi
post electionē cleri & populi: & can. 26.
distin. eadem, Celestinus papa ad epi-
scopos Gallix sic scribit, Cleri, plebis,
& ordinis consensus & desiderium requi-
ratur in ordinatione sacerdotum.* Iterum
Leo 1. papa in codice Gratiani cā. 27.
dist. 63. *Vota ciuium testimonia populo-
rum, honoratorum arbitrium, electio cleri-*

corum, in ordinationibus sacerdotū expectantur. Per pacē & quietem sacerdotes qui præfuturi sūt, postulentur, teneatur subscriptio clericorum, honoratorum testimoniū, ordinis consensus (& plebis. Hoc verbum (ordo) est decurionū qui est senatus ciuitatis cuius principes sunt magistratus seu duumviri. Atqui hæc regula non est specialis de electionibus episcoporum, sed generaliter ad omnes ordinationes clericorū pertinet, quæ his verbis Leonis papæ sic concipitur, Nullus inuitis & non petentibus detur clericus. Nec vero tantum in electionibus clericorum singulorum princeps per magistratus consensum adhibebat, verum etiam generalibus constitutionibus, quos reiici vellet, statuebat. Superius dixi vnamquamque ciuitatem suam habuisse senatum qui simpliciter ordo

dicebatur, cæteri nomine plebis seu populi comprehensi aut ciues erant origine non tantum domicilio, & hi propriè ciues seu municipales dicebantur, aut domicilio seu incolatu solo, qui incolæ dicuntur teste titulo ad municipales & de incolis. Ex his Cōstātinus sanctissimus imperator quos repelli vellet ab ordinationibus constituit duabus legibus quæ in codice Theodosiano habentur, vna ad Bassum, altera ad Ablauium præfectos prætorio. Primum curiales, id est, senatores ciuitatis repellit, dein eos qui origine ciues erant siue diuites siue pauperes, tum etiam incolas diuites, solos incolas pauperes ad ordinationes admittit, quia aliorum personæ & fortunæ muneribus personalibus & patrimonialibus ciuitatum necessariae erant. Hæc sunt iura supremorum

principum in electionibus & ordinationibus clericorum. Sub imperatoribus occidentis hoc ius cōseruatum est. Ansegisus enim archiepiscopus senonensis qui secundus Papa Gallia & germana dictus est ob legationem romanæ sedis, qua in his regionibus fungebatur, constitutiones Caroli magni collegit, quarum una est qua prohibetur ne quis clericus vel monachus fiat sine eius consensu. Eius constitutionis verba sunt hæc : *De liberis hominibus qui ad seruitium dei se tradere volunt ut peius hoc non faciant quam à nobis licentiam postulent, hoc ideo quia audiuius aliquos ex illis non tam ex causa deuotionis hoc fecisse quam pro exercitu seu pro alia regali functione fugienda. Quosdam vero cupiditatis causa ab his qui res illorum concupiscunt circumuentos audiuius, et*

hoc ideo fieri prohibemus. Cum ait
 seruitium dei, idem cum antiquis im-
 peratoribus dicit, qui sub his ver-
 bis, *λειτουργία θεῷ* intelligunt clericatū &
 monachismū l. *θεσπίζομεν. 53. §. πρὸς τέτοις.*
 C. de Episc. & cler. Atqui constitu-
 tiones Caroli magni in Italia serua-
 bantur teste Leone quarto papa ad
 Lotharium Augustum scribente
 can. de capitulis distin. 10. Omitte-
 re verò non possum constitutiones
 imperatorum quibus iubent ut cleri-
 ci ordinandi sumantur ex eadem ci-
 uitate, imò ex eodem vico in cuius
 ecclesia sunt collocandi, l. in eccle-
 sijs. 11. C. de episcop. & cler. nec etiā
 tot Nouellas iustiniani præterire pos-
 sum quibus statuit ut determinatus
 sit numerus clericorum, quarum le-
 gum plurimæ factæ sunt aduersus
 typhum episcoporum qui hoc im-

menſo clericorum numero dignitatem & potentiam ſe augere putabant, vt ait Zoſimus papa in episto-
la ad epiſcopum Salonitanum quæ
eſt codice vetere romano, cum ait
*epiſcopos ex huiusmodi ordinationum
numero pompam multitudinis quære-
re & putare ex hac turba aliquid ſibi
dignitatis acquiri.* Si verò hæc om-
nia iura ſunt principum ſuperiorum
vt nec ordinationes hominum ſin-
gulorum ſine eorum aſſenſu fieri poſ-
ſint : quanto magis ne nouum plu-
rium perſonarum collegium, vni-
uerſitas, eccleſia ſine eorum volun-
tate conſtituatur. Si clerici ex ea-
dem ciuitate eodemque vico ſumen-
di ſunt in quo ſeruire deo debent, at-
que hoc ius ab illis conſtitutum ſer-
uandum eſt, quanto magis prohibēdi
ius habēt ne collegium foris institu-
tum

tum in eorum prouincias immittatur ex clericis forte compositum, qui habeant in sinu aphorismos confessorum, inter quos relatū est clericos crimen maiestatis admittere non posse, quia nō sint subditi principi temporali. Aduersus quod genus belli neq. principum fortitudo, neq. custodum corporis, neq. arces, neque exercitus eos satis cōmodè tueri possunt. Si verò clericis imperata est stabilitas, ne possint ab vna ciuitate in aliā transferri, vt relatum est à Gratiano dist. 71. & in canonibus codicis primitiuæ ecclesiæ: quanto magis principibus liberū esse debet a finibus suis arcere hominū extrancorū collegia vaga & instabilia, & ad libitū alterius quocumque terrarum peregrinantia. Sanè agnoscendum est romanum pontificē ecclesiæ caput esse & principem epi-

scopalis coronæ. At sanctis canonib.
fincitum est vt vnaquæque ecclesia
sibi suos clericos eligat, vt neque ciui-
tas in ciuitatem, neq. diœcesis in di-
œcesim imperium & potestatem sibi
tribuat. Sunt enim quatuor genera e-
piscoporum quot & conciliorum ca-
nonibus sacris, episcopi scilicet ciui-
tatum, metropolitani prouinciarum,
patriarche seu primates diœceson &
patriarchæ œcumenici. Sic enim præ-
cipit can. secundus cōcilij Constātin-
opolitani, qui & codice ecclesiæ anti-
quæ catholicæ & codice vetere roma-
no continetur, de diœceson finibus
regundis factus (est autem diœcesis
multitudo prouinciarum.) *Qui sunt,*
inquit, super diœcesim episcopi, nequaquã
ad ecclesias, quæ sunt extra præfixo sibi
terminos accedāt, ne eas hac præsumptio-
ne confundant. Non vocati autem episco-

pi vltra suam diœcesim, accedant propter ordinationes faciendas vel propter alias dispensationes ecclesiasticas. Itaque hæc iura quæ sunt ordinariæ potestatis ciuitatum, prouinciarum, diœceseon confundi non debent, neque superior in inferiorem quidquam sibi arrogare præter definitiones canonum ecclesiasticorum. Potestatis ordinariæ pontificis romani sunt, quæ ei canon. 6. concilij Niceni tribuuntur intra suburbicarias ecclesias, ait Ruffinus Venetus & presbyter Aquileiensis concilij Niceni mentem referens. At Ruffino bellum indicunt scriptores romani huius temporis, nescientes quæ sint illæ ecclesiæ, quas primæ & ordinariæ potestati papæ subiectas intelligit concilium Nicenum. Ruffinus vero Ecclesias intellexit suburbicariarum prouinciarum vel

regionum quæ sunt quatuor, prima romana intra præfecturæ urbanæ terminos, siue, quod idem est, intra centesimum ab vrbe miliarium lapidem, & tres aliæ quibus ipsa cingitur, Campania tota, Picenum suburbicarium & Tuscia suburbicaria, quarum sæpius meminit Notitia imperij romani. Sed huic rei explicandæ opus esset longiore oratione & descriptione quadam geographiæ politicæ & ecclesiasticæ imperii romani. Magnitudo enim tanta est huius argumenti ut si dignitati eius oratio seruiret, maiorem in modum ex cresceret hæc epistola. Ab illo antiquissimo tempore Italia diuisa est, quod ad ciuilem administrationem attinet, in duas diœceses, alteram vrbis romæ, ad quam regiones extra Apenninum positæ pertinent, alteram citra Appenninum, eius

iugis & Alpibus clausam, in qua sita est Venetia regio. Iuribus etiam diceceseon succedere regna, quæ dissoluto imperio romano nata sunt. Quare nulla iuris canonum ratio patitur, ut in Venetia regione extra suburbicarias prouincias sita summus pontifex collegia noua clericorum instituat, vel foris instituta in Venetiam & reipublicæ serenissimæ subiectas prouincias immittat sine ipsius authoritate & consensu.

Superest ut de tertio capite controuersiae propositæ differam, in quo agitur de senatusconsulto quo laicis vetitum est ne res soli in ecclesias transferant sine senatus voluntate. De quo mihi respondendum est eo quo proposui ordine ex iure diuino, ex iure canonico ecclesiae veteris catholicae, & romano Iustiniano. Hæc vero

quæstio ab aliis duabus quæstionibus quæ illi sunt præiudiciales, pendet: prior est quis de rebus ecclesiæ statuendi ius habebat, posterior in quos usus res ecclesiæ sint impendendæ. Quod attinet ad priorem, sic dicitur in Actis aposto. *Omnes qui credebant erant pariter, & habebant omnia cõmunia, et possessiones vendebant, & dispertiebant ea omnibus prout cuiq. opus erat.* Omnes, ait, credentes dispertiebant: ergo tota ecclesia. Codex canonicus veteris ecclesiæ catholicæ earum rerum potestatem, quæ prius totius ecclesiæ fuerat, committit senatui clericorum, cui præest episcopus canone ultimo concilij Antiocheni, qui canon non solum codice ecclesiæ catholicæ, sed & codice vetere romano & nouo quem Gratianus collegit, continetur. Eius canonis verba sunt hæc,

Episcopus ecclesiasticarum rerum habeat potestatem ad dispensandum erga omnes qui indigent cum summa reuerentia & timore dei. Participet autem & ipse quibus indiget, si tamē indiget, tam suis quā fratrum qui ab eo suscipiuntur necessarijs vsibus, profuturis: ita ut ī nullo qualibet occasione fraudentur, iuxta sanctum apostolum sic dicentem, habentes victum & tegumentum his contenti simus. Quod si contentus istis minimē fuerit, cōuertat autē res ecclesiæ in suos vsus domesticos & eius commodo vel agrorum fructus non cum conscientia presbiterorum & diaconorum pertractet, sed horum potestatem domesticis suis aut propinquis aut fratribus filiisque cōmittat, ut per huiusmodi personas occultē cæteri ladātur ecclesiæ, synodo prouinciæ penas iste persoluat. Si autē & aliter accusetur episcopus aut presbyteri qui cū ipso sunt, quod ea quæ per-

tinent ad ecclesiã velex agris velex alia
qualibet ecclesiastica facultate sibi met
usurpent, ita ut ex hoc affligantur quidẽ
pauperes, criminationi vero & blasphem
ijs, tam sermo prædicationis quã hi qui
dispensant taliter, exponatur, et hos oport
et corrigi, sancta synodo id quod decet ap
probante. Cum ait canon latine red di
tus in codice vetere romano, episco
pum de rebus ecclesiæ decernere de
bere cum consciẽtia presbyterorum
& diaconorum, intelligenda est ap
pellatione conscientiæ non scien
tia sed sententia cleri. Græcuse
nim canon habet *Διάγρῳς*. Itaque
omnis clerus ciuitatis de ea re de
cernere debet, non solus episco
pus. Nihil hic dicitur de ordinibus
laicorum: principi enim, qui corũ vi
ce fungitur, vetus ecclesia, vt iam di
ctum est, canones suos commenda
bat

bat ut eos probaret & eorum custodiam haberet. Quare etiam Iustinianus Nouellis alienationem prohibet bonorum immobilium ecclesiæ, ne pretia eorum, ut ait, absumerent clerici in proprios usus, & pro ecclesiæ totius utilitate contra episcopos & clericos, non pro clero contra ecclesiam hæ constitutiones factæ sunt. Ut vero in ciuitate bene morata & constituta alij de rebus ciuitatis decernunt secundum ipsius leges, alij ex decreto illorum pecunias publicas collibunt & expendant, accepti & expensæ ratione reddituri: sic in ecclesia olim bene constituta factum est. Decernebat autem vel tota ecclesia ex iure diuino, vel totus clerus ex iure canonum de rebus ecclesiæ, eius vero æconomus decreta executioni mādabat, rationem administrationis reddisu-

rus. Illius œconomi fit mentio can. 8. concilij Gangrensis. Cum vero sensim episcopi per se res ecclesiæ administrare cuperent, ut liberum arbitrium in quos vellent usus, eas absumendi usurparent, hoc illis cā. 28. concilij Chalcedonensis prohibitum est. Hi duo canones reperiuntur quoque in codice vetere romano. Iustinianus etiā Nouella 123. œconomorum usum in ecclesia conseruat, & ab ijs episcopi quæ sibi necessaria sunt ut recipiant constituit, dum prohibet œconomos impensas episcopis soluere qui in comitatu præter eius constitutionem morantur. Dictum est ex iure diuino, canonico, & iustiniano vel totam ecclesiam vel clerum totum de rebus eius decernere debere, & ex decreto, œconomos res eas administrare, rationem administrationis reddituros

Secunda quæstio est in quos usus expendi debeant. Consentunt omnia iura diuinum, canonicum, & iustinianum bona ecclesiæ in alimenta pauperum absumi debere, siue clerici sint, siue monachi, siue laici. Sed & in ministrorum & pastorum ecclesiæ usus necessarios eatenus vt se frugaliter & sine luxu tueri possint. Victum enim & vestitum solum eis decernit Paulus, qua appellatione veniunt res omnes ad vitam cum modestia & frugalitate necessariæ. Codex canonum primitiæ ecclesiæ decretum Pauli repetit canonicæ quærentiam retulimus, neque præterea quicquam eis decernit. Si quid amplius sibi vellet dicent, episcopi & clerus, id in

nus cum iure diuino & canonico cō-
sentit cum impensas vetat solui epif-
copo in comitatu sine causa moran-
ti. Nec tantum fructus rerum, sed
& earum pretia in vsus pauperum
absumi iubēt apostoli & patres. Qui
enim eorum ætate liberales in ec-
clesiam esse volebant, potuissent res
suas ecclesiæ dicare & fructuum pre-
tia singulis annis apostolorum pedi-
bus offerre in vsum pauperum. At id
in more nō fuit ecclesię, sed res ipsas
vendebant & pretia offerebāt. Sed &
a Constantino ad Theodoricum re-
gem Italiæ & Iustinianum libera fuit
ecclesiæ potestas res suas immobiles
vendendi, can. 15. cōcilij Ancyrani,
qui canon codice primitiux ecclesiæ
catholicæ, & iterum codice vetere
romano continetur: quo eodem ve-
tere iure res omnes suas in pauperes

erogabat, victu & vestitu ministrorū suorum exceptis. Cui iuri proximum est Iustinianum qui pro ecclesia cōtra clerum, non pro clero contra ecclesiam constitutionem fecit, qua vetat ne res soli ad ecclesias pertinentes vēdere liceat, ne clerus pretia rerum venditarum in fraudem ecclesiæ sibi vsurpet. Quare hæ duæ regulæ exaduerso opponuntur. Prior & antiquior qua ecclesiæ res soli venire debent neque retineri. Altera qua ecclesia res soli sibi habere nec vēdere potest. Vtra fuerit ecclesiæ utilior, vsus & euentus docuit. Cum enim in vsus pios res omnes ecclesię absumebantur, excitabatur in animis christianorum erga ecclesiam liberalitas,

tionem liberalitas, libertatem erogatio subsequeretur, & perpetua successione diuitum bona in pauperes transirent. Atque ea ratione pauperibus ex paupertate emergendi potestas dabatur ut bonis artibus diuitias sibi compararent quæ deinceps in pauperes totæ consumerentur. Quod ius si feruaretur, usus edoceret, quanta felicitas hominibus oboriretur ex disciplina legum religionis christianæ. Contraria constitutio quæ ecclesias res soli sibi retinere permittit & vendere vetat, mala prioris legis bonis aduersaria peperit. Nam rebus ecclesiæ non absumptis in pios usus, donandi quoque pia voluntas refrigerat, res soli a laicis in ecclesias varijs artibus transeunt, familiarum numerus quo respublica sustentatur, & laicorum omnis ordo minuitur, quæ

CONSULTATIO. III

que restant laicorum familiæ diuitijs amissis non tantum in rusticos, sed in pericæcos Cretenſium vel Ilotas Lacedemoniorum degenerant, qui ſeruitiorum genera fuerūt dominorum agros colentia. Denique ſenſim chriſtiani laici in Iudæorū conditionem & ſeruitutem tranſirent, quibus res ſoli poſſidere non licet. Vt hiſ malis obuiam iretur quæ oriuntur ex conſtitutione Iuſtiniani quam bona mēte fecit, eadē authoritate omnes Principes orbis chriſtiani modum ſtatuerunt comparationibus rerū ſoli quas eccleſiæ facerent, & partem aliquam iuris diuini & apoſtolici reſtituerūt, vt qui vellent in eccleſiam liberales eſſe, res ſuas venderent, præria ad ne-

imitatus senatus Venetus eandem legem necessitate cogente fecit. Aut enim noua distributio bonorum ecclesiæ secundum ius diuinum & canonicum veteris ecclesiæ catholicæ facienda fuit, qua infinito numero pauperum omnis generis clericorū, monachorum, laicorum succurreretur, aut modus paupertati & diminutioni familiarum quæ ex laicorum matrimonijs propagantur, adhibendus fuit. Prior ratio sanctior & utilior rei publicæ & ecclesiæ fuisset, at posterior ita necessaria ut sine summa perniciæ ab hac abstinere, sapiētia senatus nō potuerit. Quare si ob hæc tria capita controuersia, quam proposuisti; senatus sequutus ius diuinum, canonicum & romanum, in quibus posita est libertas principum & populorum Italiae, excommunicatus
fuit,

fuit: scito in senatus persona & cum eo apostolos & patres sanctorum canonum authores excommunicatos fuisse, quod neque mirum neque nouum videri debet. Apostolus enim Iohannes superstes à Diotrephe quē *ἐξελθόντες* fuisse dicit, excommunicatum se scribit epist. 3. cum Diotrephe neque eum neque literas ab eo ad ecclesiam scriptas in illammitteret, illos etiam qui cum eo communicarent fratrum hospitio ex ecclesia eiiceret. Sed hæc senatus excommunicatio non tam à Pauli quinti sanctitate quam ab adulatorum, quibus summæ potestates nunquam caruerunt, praua suggestionem orta existimanda est. *ἐν τῇ* ad eum prouocan-

114 CONSULTATIO.

tas plura desiderabat, sed non ea mente ut publicentur. Quod si tibi visum fuerit eorum legendorum copiam amicis facere, & te & illos monitos cupio, mea me ecclesiæ dei subicere, & hæc à me scripta esse optare cum bona venia mei regis, qui quamvis miles sit fortissimus & summus imperator, pacem tamen colit & omnibus principibus eius tuendæ author est, & ob hanc controuersiam ne partes ad arma veniant summo studio contendit. Vale. Dat. K. D. 1606.